



FM 2015/140

Randi Vestergaard Evaldsen

21. maj 2015

**Kommunit akornanni aningaasaqarnikkut naligiissaarinerup sunik tunngaveqarluni sunillu siunertaqarluni pisarnissaanik oqallinnissamut siunnersuut.**

(Inuit Ataqtigiit Inatsisartunut ilaasortaataat)

Ilumoorpoq kommunit akornanni aningaasaqarnikkut naligiissarineq pillugu oqallinneq sakkortusimammat sivisulunilu. Demokraatini isumaqarpugut kommunit akornanni aningaasaqarnikkut naligiissarisooqassasoq, naligiissaarinerli pissaaq pivisusunik tutsuviginartunik, paasiuminartunik naapertuuttunillu uuttuutinik tunngaveqarluni. Atagu assersuusiulaarlanga:

Oqallinneq ukiariartulernerani 2014-mi sakkortuseruttormat oqaatigineqarpoq uuttuutit taamani ilagigaat nuttarneq. Uuttuutaasoq naatsumik oqaatigalugu isumaqarpoq, kommunit innuttaasunit najugaqarfigiumaneqanngitsut amerlanerusunik naligiissaarutinik pissasut, akilerneqartussanik kommuninit nutserfigineqartunit.

Tassa imaappoq, uttuutit atorneqartut naapertorlugit kommunit innuttaasunit najugaqarfigineqarusunngitsut akissarsissapput. Uuttuut tamanna assersuutissatsialaavoq uuttuummut naapertuutinngilluinnartumut eqqarsaatigilluangaanngitsumullu - sualummik eqqarsaatigalugu, innuttaasoq nuuttoq kommunimut qimataminut aamma akileraanginnarallartussaammat qaammatit 16-t tikillugit.

Allatut oqaatigalugu Demokraatinut pingaartorujussuuvoq siunissami naligiissaarinermut aaqqissuussinermi eqqarsaatigineqassammat naligiissarineq naapertuuttoq, kommuninullu ataasiakkaanut kajumissaarisussaq ilungersornissaanut innuttaasut nuutsaaliorniarlugit nutaallu qarmarniarlugit. Kommunit ataasiakkaat pinngitsaalineqassapput najukkami ineriartornissamut suliffissanillu pilersitsinissamut tunngavissanik pitsaasunik pilersitseqqullugit.



### **Najugaqariaaseq uuttuutaavoq pingaarutilik**

Siunissami naligiissarinermut aaqqissuussinermi ataqqineqassapput kommunip aningaasartuutai piviusut.

Atagu najugaqariaaseq qiviariartigu. Tassani ukioqatigiiaat ilaat allanut naleqqiullutik aningaasartuutaanerusarput - tassa eqqarsaatigaakka meeqqat pensionisiallillu. Taamaattumik qiviarneqartariaqarpoq kommunini ataasiakkaani meeqqat pensionisiallillu qassiunersut.

Allat annertuumik kommunini aningaasartuutaasut tassaapput suliffissaqanngitsut.

Taamaattumik aamma eqqarsaatigineqartariaqarput, kommunini ataasiakkaani inuit qassit suliffissaqanngitsutut inissisimanersut.

Isertitat eqqarsaatigalugit pisariaqarpoq qiviassallugit kommunit ataasiakkaat inuit akileraarutaannik ingerlatseqatigiiffiillu akileraarutaanik qanoq isertitaqartartiginersut taakkulu aallaavigalugit naapertuuttunik isertitanik agguaasarluni.

Massakkut naatumik oqaatigalugu imaappoq inuit akileraarutaat eqqarsaatigalugit, kommunit pisarlutik imaluunniit tunniussisarlutik nuna tamakkerlugu agguaqatigiisillugu isertitaat 90 procentinik minneruppata imaluunniit 115 procentinik anneruppatat. Taamaattumik Kommuneqarfik Sermersooq kommunini kisiartaalluni allanut tunniussisarpoq kiisalu Kujalleq Qaasuitsorlu tunissutisarlutik, Qeqqata kommunia akiliuteqaranilu tunniussaqaarneq ajorpoq. Demokraatini isumaqarpugut naatsorsueriaaseq taamaattoq pitsaasuusoq naapertuullunilu.

Naggataatigut Naalackersuisut kommunillu kaammattorusuppagut siunissami naligiissarinermut aaqqissuussinissaq pillugu pitsaasumik inerititaqarfiusumillu oqaloqatigiissutigilertariaqaraat.

Tamanna demokratip suleqatigiiffiusup ajungaanerissavaa iluatsissagaluarpat isumaqatigiissuteqarnissaa. Tassani tamatta eqqaamassavarput, isumaqatigiinniarnermi kissaatit tamarmik piviusunngorsinnaaneq ajormata. Allatut ajornartumik naapiffissarsiortoqartariaqartarpoq.

Taakkuugallarput Demokraatini oqallinnermut ilanngukkusutagut.